


Til Norges vassdrags- og energidirektorat
nve@nve.no

v/ Mathilde Berg
mbe@nve.no

v/Frode Berntin Johansen
fbj@nve.no

Fra Norgga Sámiid Riikkasearvi
nsr@nsr.no



Din ref./Deres ref:
201600703 ja/og
201702928

Min ref./Vår ref:
BN/bn

Beaivi/Dato:
31.12.17

GULAHALLANCEALKÁMUŠ - Davvi vindkraftanlegg ja Nettiiknytning for Davvi vindkraftverk

Dákko bokte sádde Norgga Sámiid riikkasearvi iežas gulaskuddancealkámuša NVE dieđáhusaide *Davvi vindkraftanlegg, áššenummir 201700703* ja *Nettiiknytning for Davvi vindkraftverk, áššenummir 201702928* mat leat dieđihuvvon *Grenslandet AS* fitnodagas.

Norgga Sámiid Riikkasearvi (dás duohko *NSR*) vuostilda *Grenslandet AS* (dás duohko *fitnodat*) plánaid dán bieggamillopárkka huksemii ja dáhttu vuot fitnodaga geassit dáid plánaid. Sihke vai fitnodaga, NVEa ja min návccaid ja áiggi seastit. *NSR* lea álggu rájes čielgasit cealkán sihke NVEii ja fitnodahkii ahte dáid plánaid vuostildat go lea menddo stuorra váikkuhus sámi servodahkii.

Mii ákkastallat oainnumet ná;

Guovlu gosa lea plánejuvvon bieggafápmoindustriija lea erenoamáš dehálaš ja divrras guovlu sápmálaččaide, muhto maid olles Sápmái. Lea maid okta dain stuorámuš guovlluin norggabeale Sámi gosa ii leat vel áktánasat sisabahkkejuvvon. Luonddus lea iežasárvu ja go dán guovllus eai báljo gávdno dál sisabahkkemat, de šaddá dađi deháleabbot máilbmái, go leat nu unnán dákkár guovllut báhcán. Dákkár dilli, mas mii sámit fertet ijatbeaivve bealuštit iežamet vejolašvuodaid, vuoigatvuodaid ja leahkima, čuohcá garrasit sihke álbmogii ja eaŋkilálbmuide. Sámi guovlluide sisabahkkejuvvo dál juohke sajis ja dáža eiseváldit fertejtit dál čavget dáid sisabahkkemiid vejolašvuodaid, ovdal go sámi servodat, árbevierut, kultuvra ja eadnamat buvihuvvojtit.

Plánaguovllus gávdnojit sámi kulturmuittut mat leat dehálaččat sápmelaččaide, go mis dávjá eai leat olu luottat báhcán min máddariin. Dat jo iešalddis duođašta ahte sámit leat álo atnán luonddu bassin ja divrrasin, go eat leat dáhtton bilidit ja goaridit iežamet guovlluid ja nu eai leat báhcán luottat min manjis. Rásttigáisá, mii lea justa máttabealde plánejuvvon guovllu, lea bassi várri ja maiddái birastahtti guovlu lea bassi ja leamaš ja lea ain dehálaš guovlu sámi vuoigalašvuhtii. Dán láhkai leat guovllus oaidnetmehtun bealit maid ii sáhte čájetit makkárgé váikkuhusguorahallamis. Dákkár guovllut leat erenoamáš dehálaččat sámi álbmogii, go kolonialisma lea jávkadan olu min vuoigalaš árbbis.

Norgga Sámiid Riikkasearvi | Vuona Sámi Rijkasiebrrer | Nøørjen Saemiej Rijkhesiebrrer | Norwegian Saami Association | Norske Samers Riksforbund | NSR.no

Postboks 173

N-9521 GUOVDAGEAIDNU

Telefon +47 78 48 69 55 Bankgiro 4901.10.15084

Telefaks +47 78 48 69 88 Org.nr. 971 481 463

Mobil: +47 988 50 273

E-post nsr@nsr.no

Plánaguovllus leat jo sámi ealáhusdoaimmat ja erenoamážit boazodollui čuozašii bieggaturbinindustriija garrasit. Dat diehtuvuođđu mii dál geavatuvo eiseváldiid bealis go dákkár áššiin mearridit čájehuvvo leat hui váilevažžan. NVE ferte manjdit buot lobiid ja lobi addimiid bieggaturbinhuksemin boazodoalu guovlluin dassáži go diehtovuoddu lea ođasmahttojuvvon. Boazodoalus leat vásihan olu stuorát garvimiid go dutkammat dássáži leat čájehan muhto leat jođus dutkanprošeavttat mat dán guorahallet. Dás mii čujuhat dan dutkamii mii lea dáhpáhuvvomin Rággočearu bieggaturbinaid ektui, gos orro duodaštuvvomin ahte lea olu stuorát váikkuhus dán turbinain go ovdal lea čájehuvvon dutkosiid bokte. Ođđa dutkan ja maiddái boazodoalu iežas vásáhusat čájehit ahte boazu ballá ja de garvá elfápmolinjjáid, nu de leat dát ge stuorra sisabahkkemat ja fitnodat lea plánen suomabeale sámi guovlluid maid goaridit dáiguin. Dán beali maid ferte NVE váldit vuhtii ja oaidnit daid obbalaš váikkuhusaid, go sisabahkkemat eai čuoza dušše sámi álbmogii mii lea norgga rájaid siskkoabealde. Guovlu lea maid dehálaš ja rikkis guovlu báikkálaš birgejupmái, de plánejuvvon bieggaturbinindustriija uhkida guovllu olbmuid sihke árbevirolaš ja ođđaáigásaš ávkkástallama.

Fitnodat lea maid eahperehálaččat máinnašan iežas bargguid go lea čuoččuhan ahte "mii bijaimet buot boazodoallokárttaid badjálaga ja gávnnaimet vilges dielkku kárttas". Dan eai sáhte dahkan go dát kárttat čájehit ahte boazodoallo geavaha guovllu. Fitnodat maid vällji dan áidna váikkuhusguorahalli masa boazodoalu bealis ii gávdno luohhtámuš, vaikko ledje beassan diehtit dán ovddalgihtii. Lea imaš go fitnodat álggu rájes jo vällje eahperehálaččat doaimbat.

Fitnodat ii leat čuvvon árbevirolaš sámi vuogádagaid ja vieruid go jearakeahttá cealká ahte dáhttu bahkket min guovlluide. Sáhtta datte ge leat belohakkii áddehahti ahte fitnodat ii leat čuvvon rivttes vugiid dássáži, das go dáža eiseváldiin lea dađi bahábut hui váilevaš vuogádat ja áddejupmi sámi rivttiin, árbevieruin ja kultuvrras. Muhto dát ii leat ankke doarvá buorre ágga fitnodakkii láhttet mo láhtte, go fitnodagas lea iežas ovddasvástáduš dáid guorahallat ovddalgihtii. Dan ii oro fitnodat dahkan. Sisabahkkenplána lea baicca čielga ovdamearka dasa mo olggobeale olbmot bohtet sámi guovlluide jearakeahttá ja navdet dáppe lea dušše váldit maid dáhttot.

Fitnodat ja maiddái Norgga eiseváldit, jus addet lobi dán huksemii, gártet rihkkot earret eará vuodđolága, luonddumánnggabealátvuodálága, boazodoallolága, ILO-Soahpamuš 169 ja ON Álgoálbmotjulggastusa. Dáid rihkkumiid mii čuovvolat jus luoitá fitnodaga min guovlluide.

Dát cealkámuš ii leat ollislaš ja leat olu bealit mat guset áššái. Muhto jus grenselandet as ankke dáhttu joatkit iežas plánaiguin "Davvi vindkraftverk" ja "Nettilknytning for Davvi vindkraftverk" de fertejit buot bajábeale namuhuvvon ákkastallamat ja maiddái eará servviid ja sámiid gulahallancealkámušat vuhtii váldojuvvot váikkuhusguorahallamis.

NSR vuot dáhttu Grenselandet AS geassit iežas planaid.

Dearvvuođaiguin

Beaska Niillas

Jodiheddji Norgga Sámiid Riikkasearvvis

Norgga Sámiid Riikkasearvi | Vuona Sámi Rijkasiebrre | Nøørjen Saemiej Rijkhesiebrre | Norwegian Saami Association | Norske Samers Riksforbund | NSR.no

Postboks 173	Telefon	+47 78 48 69 55	Bankgiro	4901.10.15084	Mobil:	+47 988 50 273
N-9521 GUOVDAGEAIDNU	Telefaks	+47 78 48 69 88	Org.nr.	971 481 463	E-post	nsr@nsr.no